

禹貢錐指卷第七

德清胡渭學

荆及衡陽惟荊州

傳曰北據荆山南及衡山之陽正義曰以衡之南無復有名山大川可以爲記故言陽見其境過山南也渭按地理志禹貢南條荆山在南郡臨沮縣東北衡山在長沙國湘南縣東南今湖廣襄陽府南漳縣有荆山本漢臨沮地衡州府衡山縣有衡山本漢湘南地也詳見導山

殷有荆而無梁爾雅漢南曰荊州注云自漢南至衡山之陽漢水出蟠冢梁州山也自蟠冢以東至大別凡在漢水之南者皆爲荊州然則禹貢梁州

之地荆亦兼之不盡歸於雍自大別以東江南之地爲揚所侵而大別以西漢東之地亦皆入於豫荆州之境縮於東北而贏於西南殷因於夏所損益可知也周禮正南曰荊州衡山雲菅江漢皆禹貢荊州之山水唯其浸潁湛則有可疑鄭云潁出陽城宜屬豫州在此非也湛未聞今按漢志潁水出潁川陽城縣陽乾山東至下蔡入淮湛水見杜預左傳注襄十六年晉楚戰于湛阪注云襄城昆陽縣北有湛水東入汝水經注湛水出犍縣北魚齒山東南流歷山下爲湛浦春秋襄公十六年晉伐楚楚公子格及晉師戰于湛阪楚師敗績遂侵

方城之外今水北山有長阪蓋即湛水以名阪故有湛阪之名湛水又東南逕昆陽縣蒲城北而東入汝杜預亦以是水爲湛水周禮荊州其浸潁湛鄭玄云未聞蓋偶有不照也今考地則不乖其土言水則有符經文矣然湛與潁實皆在河南淮北之地若割以屬荊則斗入豫域七八百里略似後世郡國犬牙相制之形非帝王分疆建牧之意潁湛二字或古文傳寫譌繆如兗州盧維之類未可知也周承殷制亦有荊而無梁李巡注爾雅言雍兼梁地賈公彥疏周禮言雍豫並兼梁地而皆不及荆殆未察漢南曰荆之義耳蓋殷周之荊豫皆

以漢水爲界梁州漢北之地豫兼之漢南之地荆兼之其蟠冢以西則雍兼之故二代無梁焉

漢志云周改禹徐梁二州合之於雍青顏注謂省徐以入青併梁以合雍諸儒皆從其說而林少穎獨疑之曰職方氏於青州其山鎮曰沂山其川淮泗其浸沂沫則徐合於青無足疑者若夫雍州其山鎮曰嶽山其澤藪曰弦蒲其川涇汭其浸渭洛梁州之山川無一存者果何所據而謂梁合於雍乎荊州其川江漢據江漢之水發源於梁由荆而東至揚然後入於海今以江漢爲荆之川則禹貢之梁州其無合於職方氏之荊州乎按林氏此言

發前人所未發愚意實與之闇合

荊州之建國春秋時可考者楚夔聃權邛

與鄭州左

桓十一年州薨伐楚師杜注云州國在南郡華容縣東南今為監利縣地

羅貳軫凡九國戰國時屬

楚而韓秦亦少得其地秦并天下置南郡黔中長

沙南陽

東境

漢復置荊州

領郡

後漢魏晉並因之

晉領郡十九

唐為山南東道之江陵

州

竟陵

復

富水

郢

齊安

陽

夷陵

峽

巴東

歸

等郡江南西道之江夏

郢

巴陵

岳

長沙

潭

衡陽

衡

零陵

永

江華

道

桂陽

郴

朗

澧陽

澧

等郡黔中道之黔中

黔

寧夷

思

涪川

費

溪

辰

盧陽

錦

靈溪

溪

潭陽

巫

清江

施

播川

泉

夷

龍標

業

溱溪

溱

等郡又淮南道之安陸

安

義陽

申
及嶺南道之連山連山等郡按以上通典所列連山

郡當出隸古南越

騎田嶺北為桂陽嶺南為連山連山亦古南越地不當入荆域

黔中寧夷

涪川播川夜郎義泉漆溪七郡皆梁南徼外蠻夷

非古黔中地不在九州之限

元和志云黔州本漢涪陵縣理晉永嘉後地沒蠻夷經二百五

十六年至周保定四年涪陵蠻帥田恩鶴以地內附因置奉州建德三年改

為黔州大業三年又改為黔安郡因周隋州郡之名遂與秦漢黔中地犬牙

難辨其秦黔中郡所理在今辰州西二十里黔中故郡城是漢改黔中為武陵郡移理義陵即今辰州敘浦縣是後魏移治臨沅即今州是今辰錦敘樊

溪澧朗沅等州實秦漢黔中之地而今黔中及夷費思播隔越峻嶺東有沅

江水及諸溪並合東注洞庭湖西有延江水一名涪陵江自牂柯北歷播費

思黔等州北注岷江以山川言之巴郡之涪陵與黔中故地炳然分矣然則

此五州及珍縵二州皆梁南徼外蠻夷今敘瀘重慶之江南諸縣及遵義府

是也其東有峻嶺為限荆不當越此而西斗入六七百里總因黔中名亂嶺東嶺西諸州混而為一道杜氏遂有此誤敘州即巫州楚州即業州也

又有當來屬者豫域襄陽之南漳漢東之光化及

南越始安郡全義縣嶺北之地是也

全義今為興安縣屬廣西桂林府文獻通考

考云自荔浦以北為楚以南為越今舊江有申州清淑之氣荔浦相照
餘里遂入瘴鄉是天所以限楚越也此蓋就當時風氣言之近世遠以桂林
平樂二府為禹貢荊州之域恐未必然杜氏以始安
平樂屬古南越為是唯全義縣嶺北之地當入荊域以今輿地言之

湖廣武昌漢陽安陸荊州岳州長沙衡州常德辰

州寶慶永平十一府郴靖二州施州衛其襄陽麻

則唯南漳縣德安府則安陸雲夢孝感應城應山

及隨州之南境廢光化縣地黃州府則黃岡麻城

黃陂黃安四川則夔州府之建始廣西則桂林府

之全州本漢零陵縣屬零陵郡隋改置湘源縣唐屬永州五代晉改曰清湘於縣置全州明省縣入又改屬桂林及興安

縣嶺北之地縣在府東北一百二十里越城嶺在縣北三里皆古荊州域也

荆之北界判自南漳縣之荆山山在縣西北八十

里漳水所出其西為遠安興山北與梁接界荆山

之西百餘里爲景山水經沮水出漢中房陵縣注
云出沮陽縣西北景山即荆山首也故淮南子曰
沮出荆山元和志云沮水出房州永清縣西南景
山永清本漢房陵縣地也縣南一百一十三里有
建鼓馬駿二山並高峻又竹山縣西南三十五里
有白馬塞山孟達歎爲金城千里蓋皆景山之餘

脈矣南漳以東爲荆門鍾祥京山

元和志大洪山在京山縣西北二百里孤秀爲

衆山之傑及隨州之南境廢光化縣地

光化故城在今隨州東南三十餘里唐隨州管縣四通典

云唯光化爲荆域餘皆屬豫

又東爲應山縣縣北有義陽三關

見齊書州郡志

義陽唐申州治也

一曰平靖關

元和志云在安州應山縣北六十五里北至申州九十里東至百鶴關一百六十里申州

今汝寧府之一信陽州也

曰黃峴關

又名百鶴關元和志云在應山縣北九十里北至申州九十里東至灤山關一百里

一曰武陽關

又名澧山關元和志云在應山縣東北一百三十里北至申州一百五十里

即古之大

隧直轅冥阨也

左傳定四年吳伐楚自淮涉漢楚左司馬成請還塞大隧自轅冥阨自後擊之大隧即武陽直轅即黃峴

冥阨即平靖也三關又總名曰城口楚史皇所謂塞城口而入也冥亦作通又作鄆皆讀若育

又東為黃安縣有

大活關白沙關

本唐黃岡麻城黃陂三縣地明嘉靖四十二年析置黃安縣元和志云大活關在黃州黃陂縣北二百里

東北至光州二百八里西至安州澧山關一百里白沙關西至大活關六十里在州北二百四十里北至光州界二十五里

又東為

麻城縣有穆陵關陰山關

元和志穆陵關西至白沙關八十里在麻城縣西北一百里北至光州一

百四十九里陰山關西至穆陵關一百里在縣東北一百一里北至光州殷城縣二百里按穆陵關在穆陵山上或曰齊之四履南至穆陵即此也定四

年吳楚戰于柏舉亦在縣界

諸關依山為阻與荆山東西準望相直

皆荆豫接界處

荆之南界越衡山之陽大抵及嶺而止史記曰秦有五嶺之戍晉地理志曰自北徂南入越之道必

由嶺嶠時有五處故曰五嶺據水經注五嶺大庾

最東爲第一嶺在揚域餘皆屬荆第二騎田嶺在

郴州南即黃岑山亦名黃箱山今謂之臘嶺郴水所出高十餘丈南接廣東陽山縣界北寒南燠氣候頓殊第三都

龐嶺在衡州府藍山縣南亦稱都龐嶠即黃岑山龐音龍水經注作邵龍南接廣東連州界鄧德明

謂都龐在九真大謬第四萌渚嶺在永州府江華縣南亦稱萌渚嶠即古臨

賀嶺又名白芒嶺今名桂嶺高三千餘丈南接廣西平樂府賀富川二縣界第五越城嶺在桂林府

興安縣北五嶺之最西嶺也亦稱越城嶠又名始安嶠嶺北一百三

十里接寶慶府城步縣界經曰衡陽未知所極然

酈氏有言古人云五嶺者天地以隔內外見水經溫水注韓

退之曰衡之南八九百里地益高山益峻水清而

益駛其最高而橫絕南北者嶺中州清淑之氣於

是焉窮藉比表界差爲近理耳

荆之東界準揚約略言之蓋自麻城黃岡踰江而南爲武昌縣又西南爲通山咸寧崇陽通城又南爲瀏陽醴陵攸縣茶陵又東南爲興寧桂東桂陽又西南爲宜章皆與揚分界處也

荆之西界經無可見今據戰國時巴楚分地約略言之蓋自巴東踰江而南爲建始施州麻陽沅州又東南爲黔陽靖州通道以訖於興安與貴州廣西接界

江漢朝宗于海

釋文朝
直違反

傳曰二水經此州而入海有似於朝百川以海爲宗

宗尊也正義曰老子云江海所以能爲百谷王者以其下之是百川以海爲宗鄭云江水漢水其流遄疾又合爲一共赴海也猶諸侯之同心尊天子而朝事之王氏焘曰此僅六字耳而江漢趨海之勢如在目前嘗於武昌夏口望之見其渺瀰奔瀉如人之有所往而意專行速不違他顧狀以朝宗傳水之神也渭接揚之三江入海無壅故禹於此州疏江決漢至大別合流雖去海尚遠而有朝宗之勢說者謂紀此以該彼非也

江水自四川夔州府雲安縣東流經奉節巫山又

東出巫峽至巴東縣入荆域又東經歸州夷陵

都枝江松滋江陵公安澧州華容至安鄉會洞庭
之水又東經巴陵沔陽臨湘嘉魚又東北至江夏
西與漢陽分界漢水從西北來注之漢水自襄陽
府宜城縣南流入荆域又南經鍾祥荆門又東南
經潛江景陵沔陽又東經漢川又南至漢陽與江
水會又東歷武昌大冶至興國其北岸為黃州府
之麻城與揚接界此禹在荆時所治也

詳見導
漢導江

郭璞江賦云巴東之峽夏后疏鑿絕岸萬丈壁立
漚駁水經江水東逕廣谿峽注云三峽之首自昔
禹鑿以通江郭景純所謂巴東之峽夏后疏鑿者
又江水東逕西陵峽歷禹斷江注云南峽北有北

谷村兩山間有水清深潭而不流者舊傳言昔是
大江及禹治水此江小不足瀉水禹更開今峽口
水勢并衝此江遂絕謂之斷江今夷陵州西南有
斷江山是其遺跡金吉甫云三峽天險非入都通
道計不施工故不書非是蓋江之有三峽猶河之
有龍門也禹治冀之河自龍門始則治荆之江亦
必自三峽始

朝宗孔鄭義已備不必引周禮春朝夏宗爲證鄭
又云荆楚之域國有道則後服國無道則先彊故
記其水之義以著人臣之禮此臆說也

九江孔殷

正義曰鄭云九江從山谿所出謂各自別源非大江也下流合於大江耳晁氏曰洞庭九江也曾氏曰沅

漸元辰敘酉湘資醴水

元當作無蓋無訛爲无又轉作元也漢志武陵無陽縣無水首受故且蘭南入沅行八百

九十里醴與澧同

皆合洞庭中東入于江是爲九江導江云過九

江至于東陵今之巴陵巴陵之上即洞庭也因九水所合遂名九江水經九江在長沙下雋縣西北楚地

記云巴陵瀟湘之淵在九江之間是也程氏曰一江

而名九江亦猶岷嶓三大派合爲一流而經以三

江總之即其例也若其九江之所以名九當時必有

所因不容鑿爲之說渭按今岳州府巴陵縣本漢下

雋縣地

下雋故城在今武昌府蒲圻縣界

縣西南有洞庭湖山海經云洞

庭之山帝之二女居之是常遊於江淵澧沅之風交

瀟湘之浦

浦本作淵水經注引此作浦今從之

是在九江之間出入必以飄風

暴雨楚地記本此說文殷作樂之盛稱引易殷薦之上帝周禮陳其殷又殷見曰同鄭注云殷衆也則殷有衆盛之義孔殷謂衆水所會其流甚盛也

孔傳云江於此州分爲九道正義曰傳以江是此水大名謂大江分而爲九猶大河分爲九河也潯陽記有九江之名雖名起近代義或當然陸氏釋文曰九江尋陽地記云一曰烏白江二曰蚌江三曰烏江四曰嘉靡江五曰畎江六曰源江七曰廩江八曰提江九曰箇江張須元緣江圖云一白三

里江二曰五州江三曰嘉靡江四曰烏土江五曰
白蚌江六曰白鳥江七曰箇江八曰沙提江九曰
廩江參差隨水長短或百里或五十里始於鄂陵
終於江口會於桑落洲太康地記曰九江劉歆以
爲湖漢九水入彭蠡澤也

湖漢九水
已見揚州

渭按秦始皇滅

楚以其都壽春置九江郡太史公曰余南登廬山

觀禹疏九江淮南子曰禹鑿江而通九路地理志

廬江尋陽縣下云禹貢九江在南皆東合爲大江

王莽改豫章曰九江郡柴桑縣曰九江亭應劭曰

江自尋陽分爲九郭璞江賦曰流九派乎尋陽自

西漢以迄東晉皆言大江至尋陽分爲九江禹之

所疏鑿而尋陽記緣江圖又備列其名元和志云
江州尋陽郡禹貢揚荆二州之境揚州云彭蠡既
緒今州南五十二里彭蠡湖是也荊州云九江孔
殷今州西北二十五里九江是也彭蠡以東為揚
州界九江以西為荊州界此亦遵舊說九江孔鄭
異義而不言其處所諸家皆謂在潯陽其以洞庭
為九江者自宋初胡旦始而晁以道曾彥和皆從
之朱子九江辨曰九江若曰派別為九則江流上
下洲渚不一今所計以為九者若必首尾短長均
布如一則橫斷一節縱別為九一水之間當有一
洲九江之間沙水相間乃為十有七道於地將無

所容若曰參差取之不必齊一則又不知斷自何
許而數其九也况洲渚出沒其勢不常江陵先有
九十九洲後乃復生一洲是豈可以爲地理之定
名乎此不可通之妄說也若曰旁計橫入小江之
數則自岷山以東入于海處不知其當爲幾千百
江矣此又不可通之妄說也且經文言九江孔殷
正以見其吐吞壯盛浩無津涯之勢決非尋常分
派小江之可當又繼此而後及夫沱潛雲夢則又
見其決非今日江州甚遠之下流此又可以證前
二說者爲不可通之妄說也九江即洞庭既有山
水二經爲根據而又得朱子此辨其不在尋陽亦

明矣

尋陽記曰今蘄州界古蘭池城亦謂之潯水城即漢尋陽縣也通典曰尋陽舊縣在江北蘄春郡界今黃州府黃梅縣東北尋陽故城是也故班志云九江在其南東晉時溫嶠移縣於江南則九江在縣北矣緣江圖所云九江始於鄂陵終於江口會於桑落洲者今已無考桑落洲在九江府城東北五十里大江中鄂陵即武昌縣縣界有崢嶸洲蘆洲楊葉洲舊志云江入縣境播為三江過中洲至雙柳夾又自崢嶸洲過磧磯至大洲為三江口疑即其類又按水經注江水東逕軼徒系反縣故城南城

對五洲江中有五洲相接故以五洲爲名漢輿
卽今蘄水縣五洲江當在此縣界也寰宇記云
江五臯洲在黃梅縣南一百十里可考者唯此而
已唐藝文志有九江新舊錄三卷不知其書尚存
否此等沙水相間當時必實有但洲渚出沒不常
以近事驗之枝江百里洲至明嘉靖初江水衝斷
爲二又江夏鸚鵡洲爲東漢以來著名之古蹟而
崇禎中蕩決無存則九派之湮滅從可知已然張
須云此九江隨水參差長短則又犯朱子所駁不
知斷自何許而數其九者禹之命名必不以此等
洲渚也

九江至春秋時爲江南之夢戰國時稱洞庭五渚
韓非子謂之五湖而九江之名遂隱傳記鮮有言

九江者及秦滅楚始置九江郡酈道元云秦立九
江郡治壽春縣兼得廬江豫章之地故以九江名

郡

見淮水注

是即尋陽之九江矣然洲渚參差長短其在

當時九派原不甚分明故鄭亦疑焉而有出自山
谿之說必求其水以實之則水經所稱巴水希水
赤水蘄水刊水富水等亦皆入江而初無總會之
處則自岷山以東至海小江千百何可勝數誠有

如朱子所言者

程泰之云古來名水不比後世錯雜如漾漢入江嘗
得與江並大而名爲北江矣然其未入江時止得名

漢不得名江安有九小谿者
望江未至而得名爲江乎

此其說又不可通故劉歆以湖

漢九水爲九江此九水者同注彭蠡以入大江謂之九江亦可然彭蠡揚州之澤也而指爲九江則荆之水而移於揚矣其可乎禹貢之九江信非洞庭不足以當之也

宋儒所據以辨尋陽之九江者曰過九江至于東陵今巴陵也夷陵一名西陵故此爲東陵而漢人則固自有其東陵矣地理志廬江郡下云金蘭西北有東陵鄉淮水出淮當作灌雩婁縣下云灌水北至蓼入決是也水經江水東逕西陵縣故城南

故城在今黃州府蘄州西

又東逕下雒縣北

今武昌府興國州東有下雒故城

刊水從東

陵西南注之酈道元云江夏有西陵縣故是言東

尚書曰江水過九江至于東陵者也

見江

又云灌水

導源廬江金蘭縣西北東陵鄉大蘇山

金蘭蓋漢初有是縣中廢故志

不書晉宋間復置故鄆注據以為言按蓼縣故城在今河南先州固始縣北灌水出全蘭縣西北之東陵鄉而東北至蓼縣入決水則金蘭當在固始之西南南直黃梅之北矣薛士龍以為東陵在漢陽蘄州間非是

褚先生所謂神龜出於江灌

之間嘉林之中蓋謂此也灌水東北逕蓼縣故城

西而北注決水

見決水注

江灌史記龜策傳作江淮與漢

志均為誤字也今按黃梅縣西南九十里有蔡山

西接廣濟縣界通典云廣濟縣蔡山出大龜書曰

九江納錫即此凡此類鑿鑿言之蓋秦漢以來相

傳之語不但東陵確有所并大龜亦真出此矣

先入為主頗難搖動而愚以三事折之曰巴陵臨

江而金蘭之東陵去江六百餘里安得云望于東

陵一非也江自巴陵以東至沙羨即迤北

胡三省曰江水東流自武

昌以下漸漸向北蓋南紀諸山所迫陂陁之勢漸使之然也

使九江在尋陽東陵在金蘭

則是先迤北而後至于東陵二非也書江漢朝宗于海盡之矣而復於其下流書九江孔殷不亦贅乎三非也朱子之辨昭昭若揭日月敢以是為燭火之助云

水經湘水出零陵始安縣陽海山

即陽朔山也在縣北湘灘同源分為二南為灘

水北則湘川今廣西桂林府興安縣本漢始安縣地山在縣南九十里應劭謂之零陵山

東北流逕長沙下

雋縣西又北至巴丘山入于江注云湘水會資沅

微澧四水

微水從東來注于湘世謂之麋湖口今巴陵縣東南微湖是也

同注洞庭而北會

大江名之五渚戰國策曰秦與荆戰大破之取洞

庭五渚也

史記蘇代說燕王云秦正告楚曰漢中之甲輕舟出於巴乘夏水而下江四日而至五渚

湖水廣圓

五百餘里日月若出沒於其中湖中有君山

一名湘山又名

洞庭山

編山相次去數十里迴峙相望孤影若浮所謂

三苗之國左洞庭者也巴丘山在湘水右岸山有

巴陵故城

本吳之巴丘即關也晉太康元年立巴陵縣於此即今岳州府治

西對長洲洲南

麇湘浦北對大江三水所會謂之三江口

在巴陵縣西北元和志云

巴陵城對一江口岷江爲西江澧江爲中江湖湘江爲南江

巴陵舊志云洞庭湖一名五湖

又名三湖三湖者洞庭之南有青草湖西有赤沙

湖而洞庭周回三百六十里南連青草西吞赤沙

橫亘七八百里因名三湖又謂之重湖重湖者一

湖之內南名青草北名洞庭有沙洲間之也今道
出湖湘間者必問津於洞庭洞庭吐納羣川而大
江西來橫亘其口每歲六七月間岷峨雪消水暴
漲自荆江逆入洞庭清流為之改色

瀟湖之縣巴陵居其
東華容安鄉居其北

常德府之龍陽居其西沅江居
其南長沙府之湘陰居其東南

渭按周禮荊州無九江蓋已

包在藪澤雲夢之中矣然自是九江之名遂不著
故或稱江南之夢或稱洞庭五渚或又稱巴丘湖
郭璞爾雅注云雲夢今華容縣南巴丘湖是也後
世既不知洞庭為九江見尋陽江中多沙水相間
處遂指其九派為九江而導山導江之文義皆不
可得通矣太史公不敢言山海經然其中亦有可

信者如謂澧沅瀟湘在九江之間賴此一語而九

江遺跡猶可推尋其有造於禹貢不小也

曾氏說九江一曰沅

出牂柯且蘭縣東北注洞庭湖入江

二曰漸

一名澹水出武陵索縣東入沅

三曰無

山牂柯且蘭縣東南入沅按說文無本古舞字故無水或加水作無又作澗

四曰辰

出武陵辰陽縣東入沅

五曰敘

一作序出武陵義陵縣西北入沅

六曰酉

出武陵充縣東南入沅

七曰湘

已見前

八曰資

一作濱出零陵都梁縣東北入沅

九曰澧

出武陵充縣東北注洞庭湖入江

朱子考定

九江去無澧二水而易以瀟蒸一曰瀟江

亦名營水出營陽冷道縣

留山北流注湘水

二曰湘江三曰蒸江

漢志作承後漢志作丞出邵陵縣界至臨承縣北東注于湘

四曰澧江五曰沅江六曰漸江七曰敘江八曰辰

江九曰酉江按朱子據導江文江先合澧而後過

九江故不數澧然澧實會南江以東注洞庭非上

流自入江也安得而不數無字誤作元朱子以爲
亡是水故置之古無瀟水酈道元云瀟者水清深
也湘中記曰湘川清照五六丈下見底石如樗蒲
是納瀟湘之名矣然則瀟湘猶言清湘非別有瀟
源隋唐以後始謂瀟水出九疑山北合湘水是曰
瀟湘耳武陵零陵長沙之水皆入沅湘如蒸水者
頗多金吉甫云郴水亦入湘舊不列九江未知與
漸斂二水大小若何然則朱子所更定亦未有以
見其爲必然也善乎林少穎之言曰九江之名與
其地世久遠不可強通然各自別源而下流入江
則可以意曉也斯真通人之見傳同叔云九江不

必求其有九如太湖一湖而得名五湖昭餘祁一澤而得名九澤皆不可以數求也此說本程泰之恐又不然當時必實有九水會同故以爲名但水道通塞離合古今不常自戰國時唯知有湘沅資微澧而名之五渚矣况後世乎與其出此入彼不若闕疑之爲得耳

正義云江以南水無大小俗人皆呼爲江或從江分出或從外合來故孔鄭各爲別解此說非也禹貢山川豈有俗稱漢合於江而後謂之北江彭蠡合於江漢而後謂之三江當其未合不得名江也九水亦必俱會於洞庭而後謂之九江凡湘江沅

江等稱皆後世俗稱也不可以說經巴陵所對之
長洲禹時蓋未曾有江身與湘浦莽為一壑九江
即大江也特以其流為九水之所匯因號九江耳
九河主其分九江主其合河自一而分為九故曰
播江自九而合為一故曰殷當其未合非獨此九
水不得冒江之名即漢與彭蠡不得冒江之名也
孔殷傳云甚得地勢之中頗費解蔡氏云殷正也
九江水道甚得其正蓋指其分處言之亦非經旨
鄭康成云殷猶多也九江從山谿所出其孔衆多
孔字作孔竅解則涉於怪矣今竊取朱子吐吞壯
盛浩無津涯之義以釋孔殷而從說文訓盛視舊

說差覺穩當

沱潛旣道

說文沱徒河反潛捷廉反渭按
潛史記作泮漢書作灑後同

傳云沱江別名正義曰導江言東別爲沱是沱爲江
之別名也釋水云水自江出爲沱漢爲潛渭按詩召
南曰江有沱荊州之沱也一在江北寰宇記江自枝
江縣百里洲首派別北爲內江者是一在江南水經
注夷水出魚復縣江至夷道縣北東入江者是潛水
或云在今安陸府鍾祥潛江二縣境然漢東之地津
渠交通未知孰爲古潛水黃文叔云自後世通渠漢
川雲夢之際禹跡固多湮沒誠然

水經注江水自夷道縣北

今宜都縣西
有夷道故城

又東逕上明城

北晉荊州刺史桓冲築此城移州治焉在今松滋縣界江汜枝分東入大江縣治洲

上故以枝江爲稱今枝江縣東北六十里有百里洲延袤百里與江陵分轄枝江故城在縣東地理

志曰江施出西南東入江是也志無南字疑此衍江水又東

會沮口又南逕江陵縣南縣江有洲號曰枚廻洲

洲在縣西南六十里枚或作枝江水自此兩分而爲南北江寰宇記云

百里洲首派別南爲外江北爲內江王晦叔云枝

江縣百里洲夾江沱二水之間其與江分處謂之

上沱與江合處謂之下沱渭按南江在古時爲岷

江之經流北江爲沱南江自枝江縣南又東逕公

安縣西又東南流爲涪水隋志松滋縣有涪水蓋東與公安接界九歌望涪

陽兮極浦橫大江兮揚靈王逸注云涪陽江碕名

附近郢即此水之北也涪水入澧州界爲四水口
歷州之東北又東南合澧水經華容縣南入赤沙
湖又東南逕安鄉縣西而東南入洞庭湖與北江
會此即禹導江東至于澧過九江至于東陵之道
也北江自枝江縣北又東逕松滋縣北又東逕江
陵縣南又東逕公安縣北又東逕石首縣北又東
逕監利縣南夏水出焉北江又東至巴陵縣西北
會洞庭之水此即江北之沱寰宇記所謂內江者
也其後北江之流漸盛而南江日微世反以南爲
沱北爲江說者遂謂東至于澧不可解以澧水北
去江二百餘里故也詳見導江

正義引鄭注云今南郡枝江縣有沱水其尾入江耳不於江出也華容有夏水首出江尾入沔蓋此所謂沱也渭按枝江沱水為江洲所隔而成何言不於江出華容夏水自江陵縣東南首受北江東北流逕監利沔陽與潛江縣分界又東北至京山縣東南而注于漢此本沱水岐分而為夏非出於大江鄭以為沱者蓋北江久已盛大世目為岷江之經流因以其所出者為沱耳禹時無此沱也不可從

漢志南郡巫縣夷水東至夷道入江過郡二行五

百四十里

今巫山縣東北有巫縣故城

水經夷水出巴郡魚復縣江

今奉節縣西十五里有魚復故城

東南過很山縣南

今長陽縣西有很山故城

又東過夷

道縣北

今宜都縣西有夷道故城

東入于江注云夷水即很山清江

也

江水注謂之夷谿

水色清照十丈分沙石因名清江昔廩

君浮此水據捍關而王巴

捍與扞同

是以法孝直有言魚

復扞關臨江據水實益州禍福之門夷水又東逕

建平沙縣

沙下當有渠字江水篇云烏飛水北流逕建平郡沙渠縣南元和志施州清江縣本漢南郡巫縣地吳沙渠縣也

縣有巫城南岸水山道五百里其水歷縣東自沙

渠入很山縣水流淺狹裁得通船又東逕很山縣

故城南

縣即山以名孟康曰音恒今世以銀爲音

南對長楊溪溪水出西南射

堂村谷中石穴北流注于夷水

隋改很山曰長楊以溪得名唐又改楊爲陽

又

東北逕夷道縣北又東逕宜都縣北

今縣治即宜都故城

東入

大江有涇渭之比亦謂之很山北溪渭接夷水首
出魚復江尾入宜都江行五百餘里是亦荊州之
沱也古時自巴入楚避三峽之險皆由此路史記
張儀說楚王曰秦西有巴蜀大船積粟起於汶山
浮江以下至楚三千餘里舫船載卒一日行三百
餘里不至十日而拒扞關扞關驚則從境以東盡

城守矣黔中巫郡非王之有

黔中漢爲武陵郡即今常德府
巫郡漢爲巫縣即今巫山巴東

建始三縣及
施州徠地也

此言舟師由夷水入楚也何以知之楚世

家肅王四年蜀伐楚取茲方於是楚爲扞關以拒
之後漢書李熊說公孫述曰東守巴郡拒扞關之
口徐廣曰巴郡魚復有扞水扞關

後漢
志同

章懷太子賢

曰扞關故基在今峽州巴山縣寰宇記云廢巴山

縣在長陽縣南七十里即古捍關是也

唐志巴山縣隋分很山縣置大

寶八載省入長陽

水經注江水自江關東逕弱關捍關

江關在今奉節

縣東瞿唐峽口

注云弱關在建平秭歸界秭歸今歸州也蓋

大江出三峽逕弱關江沱出很山逕捍關劃然兩道儀言浮江以下拒捍關則不經巫峽明矣夷水受江處不知何時日就墮塞後漢建武中公孫述遣將田戎等乘枋箬下江關拔夷道夷陵光武命岑彭吳漢伐之彭擊破戎等率舟師長驅入江關漢留夷陵裝露橈船將三萬人泝江而上則皆取道於三峽而不復由夷水矣蓋其時水已淺狹不

勝戰艦自後荆梁有事苟用舟師未有不由峽江者然酈注云沙渠裁得通船則後魏時水道猶存下逮唐初建始之北遂成斷港故章懷注西南夷傳云今施州清江縣夷水一名鹽水源出縣西都

亭山

清江廢縣亦在長陽縣界

寰宇記云夷水自施州開蠻界流入

長陽縣明一統志云夷水源出舊施州開蠻界流

經建始巴東長陽匯宜都入江蓋不復知此水出

西北奉節之大江而以爲西南施州衛之山源泉

其所謂都亭山者在開蠻界也然自漢志已不

言首受江未知何故班氏疎略頗多未經陸原妻

詳明而又有張儀之言以爲證無可疑者禹導江

自梁入荆必浮此水也

陸氏釋文焉云其中泉出而不流者謂之潛書泉

出則可言不流則非韻會潛水伏流也左思蜀都

賦演以潛沫劉逵注云水潛行曰演此二水伏流

故曰演以潛沫荊州之潛雖不如出龍門石穴之

奇亦必漢水伏流從平地涌出故謂之潛承天府

志云漢水自鍾祥縣北三十里分流為蘆伏河經

潛江縣東南復入于漢即古潛水也按潛江縣本

漢竟陵江陵二縣地唐大中十一年置徵科巡院

於白狀

見寰宇記

宋乾德二年升為潛江縣韻會瀆伏流

也或作狀今漢水之分流者名蘆伏而其地又名

白泚

在縣西四十里

皆取伏流之義此水起鍾祥縣北訖潛

江縣東南行可三百里以爲古之潛水庶幾得之

蓋禹時本自伏流涌出復入于漢及乎後世通渠

漢川雲夢之際

見河渠書

則開通上源以資舟楫之利禹

迹遂不可考耳其他沔陽漢陽之境凡漢水枝津

大抵皆通渠者之所爲志家槩指爲潛水真妄談

不足信

王晦叔曰隋志南郡松滋縣有涪水涪即古潛字

故史記云沱涪旣道今松滋分爲潛江縣矣渭按

松滋之涪乃大江分流首尾皆與漢無涉安得因

史記作涪而以此水當之潛江縣在江北本竟陵

江陵二縣地亦非析松滋置也並誤

正義曰孔梁州注云沱潛發源此州入荊州以二州沱潛爲一者蓋以水從江漢出皆曰沱潛但地勢西高東下雖於梁州合流還於荊州分出猶如濟水入河還從河出耳蘇傳曰以安國穎達之言考之味別之說古人蓋知之久矣梁荆相去數千里非以味別安知其合而復出邪林少穎云據爾雅是凡水之出於江漢者皆有此名出於荆者荆之沱潛也出於梁者梁之沱潛也不必有合流味別之說斯言足以正孔蘇之謬

雲土夢作又

釋文雲徐本作云夢之弄
反一音武仲反徐莫公反

傳曰雲夢之澤其中有平土丘水去可爲耕作畝畝
之治正義曰此澤既大其內平土有高丘也渭按雲
土夢漢書作雲夢土史記水經注並作雲土夢沈
筆談云石經倒土夢字唐太宗得古本尚書乃雲
夢作又詔改從古本雲夢澤名也方八九百里之
中有澤有湖有土而江沱潛漢亦灌注於其間職方
藪澤禹貢主上田孔子曰夫言豈一端而已夫各有
所當也雲夢土作又謂江漢九江沱潛之功畢則水
去而雲夢之土已耕治也

雲夢經傳諸書有合稱者漢書稱者周禮荊州藪
澤曰雲夢爾雅十藪楚有雲夢呂覽淮南子同載

國策楚王游於雲夢結駟千乘宋玉高唐賦曰楚襄王與宋玉遊於雲夢之臺司馬相如子虛賦曰雲夢者方八九百里其合稱雲夢者也左傳定四年楚子涉睢濟江入于雲中此單稱雲者也宣四年郢夫人棄子文于夢中昭三年楚子以鄭伯田江之夢宋玉招魂曰與王趨夢兮課後先此單稱夢者也單稱特省文耳雲可該夢夢亦可該雲故杜元凱注夢中云夢澤在江夏安陸縣東南有雲夢城則夢在江北注雲中云入雲夢澤中所謂江南之夢則雲在江南注江南之夢云楚之雲夢跨江南北則南雲北夢單稱合稱無所不可絕無

江北爲雲江南爲夢之說自唐太宗詔收此經爲
雲土夢作乂而穎達引左傳以爲之說曰此澤亦
有單稱雲單稱夢經之土字在二字之間蓋史文
兼上下也司馬貞史記索隱亦云雲夢本二澤人
以其相近或合稱雲夢宋沈括羅泌易祓郭思鄭
樵洪邁洪興祖等襲其說而爲之辯曰雲在江北
夢在江南而古注棄若塵羹矣蘇子瞻申疏意云
雲與夢二土名也而云雲土夢者古語如此猶曰
玄纒縞云爾此於文義頗不順故王氏更爲之解
曰雲之地土見而已夢之地則非特土見草木生
之人有加功乂之者矣蔡氏云雲夢之澤地勢有

高卑故水落有先後人工有早晚也自後無不遵
此說今按史記賈誼傳云長沙卑溼巴陵故長沙
下雋地也諸湖萃其西南安得為特高江北雖亦
有湖澤然楚都及漢東諸國皆在焉豈反卑於江
南此事理之難信者若從石經本則傳云澤中有
土可以耕作義甚愜當愚嘗反復於斯而覺太宗
此一改殊多事不若仍舊之為得也

漢志南郡華容縣雲夢澤在南荆州藪編縣有雲
夢宮江夏西陵縣有雲夢宮華容今監利石首二
縣監利在江北石首在江南編縣今荆門州西陵
今蘄州及黃岡麻城皆在江北水經注云雲杜縣

東北有雲夢城

見水

雲社今京山縣又云夏水東

逕監利縣南縣土卑下澤多陂陁西南自州陵東

界逕於雲杜沌陽爲雲夢之藪韋昭曰雲夢在華

容縣郭景純言縣東南巴丘湖是江南之夢杜預

曰枝江縣安陸縣有雲夢蓋跨川亘隰兼苞勢廣

矣

見夏水

州陵今沔陽州沌陽今漢陽縣也元和志云

雲夢澤在安陸縣南五十里東南接雲夢縣界以

上諸州縣皆在江北由是言之東抵蘄州西抵枝

江京山以南青草以北皆爲雲夢孔疏云雲夢一

澤而每處有名者子虛賦云雲夢者方八九百里

則此澤跨江南北每處存名焉此說是也賦家之

言華而不實唯此語爲可信然上文云楚有七澤

其小小者名曰雲夢則仍是浮夸之習

七澤疑即雲夢之別名如雲連

徒州之類

傳云雲夢之澤在江南大誤穎達順傳爲義曰左傳楚子與鄭伯田於江南之夢是雲夢之澤在江南也已又欲遵詔改之文則曰此澤跨江南北亦得單稱雲單稱夢及解作又復與傳同首尾橫決殊爲可笑爾雅之雲夢所包亦廣而郭景純以巴丘湖當之蓋本漢志然彼華容之外尚有編縣西陵之雲夢郭唯舉此湖則遺漏多矣

左傳吳師五戰及郢楚子涉睢濟江

睢即沮水古字通

入于

雲中盜攻之遂奔鄖又奔隨沈存中云鄖即今之安州涉江而後至雲入雲然後至鄖則雲在江北也因以江南之夢為證渭按吳師自東來故昭王自郢西走至枝江縣界涉睢濟江而南東行入雲

中杜注以為江南之夢則雲中在江南明甚

即今石首華容

等處沈意謂奔鄖時自江南涉江而北至雲誤矣傳

稱江南之夢對江北之夢言非謂江北為雲江南

為夢也

劉明曰已自謂江南之夢

杜注極其分明總由經文一改

說者必欲判雲夢為兩地故有此誤或曰古注誤者亦多何以知杜說為必然曰方吳之勝楚也循江北岸而西昭王若東走則遺之禽矣迨入郢處

宮之後始可從東道奔鄖耳涉睢是西行濟江乃

南渡所入之雲中必不在江北也鬪伯比淫於郢

子之女

郢國名字
亦作鄖

生子文郢夫人使棄諸夢中郢子

田見之郢都即今安陸縣

德安府治

西南距巴丘可五百

里計夫人棄此兒當在近地豈使涉江而南郢子

所田亦必非江南之夢以是知元凱之精覈而唐

宋諸家之說為鹵莽也

邵氏簡端錄云雲夢澤歟非澤也非澤而以爲澤

何居雲夢皆土也當是時洪水懷山襄陵何有於

雲夢哉水聚焉而爲澤因名之宜也於是而土焉

於是而又焉雲夢之宜也不然宜澤而土且又其

將能乎縱能之其得謂之行所無事乎周職方荆
州澤曰雲夢蓋兼洞庭有之渭按雲夢之地雖不
盡爲澤然大勢卑下鍾水獨多故職方目之曰藪
澤夏秋潦集爲澤霜降水涸爲藪其淵深而四時
不竭者則謂之湖自剖判以來有之非待懷襄始
然亦非禹功旣遠至周時胥化爲湖澤也傳云澤
中有平上高丘水去則可以耕作最有分判土其
所固有氾濫之水去而民乃作又依然行所無事
也經於此特揭一土字正以其水多而土少耳若
大陸萊夷蒙羽岷嶓則直書曰作曰藝奚必更言
土哉

或問江南之夢果爲巴丘湖湖其可田乎曰孫光憲北夢瑣言云湘江北流至岳陽達蜀江夏潦後蜀江漲漫住湘波溢爲洞庭湖凡數百里而君山宛在水中秋水過此山復居於陸唯一條湘川而已岳陽風土記云青草湖夏秋水泛與洞庭爲一水涸則此湖先乾青草生焉巴陵舊志云赤沙湖當夏秋水泛則與洞庭爲一涸時唯赤沙彌望縣東南又有澨湖一名翁湖又名閣子湖趙冬曦澨湖詩序曰澨湖者沅湘澧汨之餘波夏潦奔注則決爲此湖冬霜旣零則涸爲平野諸湖迎冬輒涸茂草叢生禽獸居之此其所以可田也然則九江

亦涸乎曰九江指湘水入江之口田聚淵深四時不竭者愚嘗謂禹時湘浦未有沙洲江身與九水之尾混爲一壑故得稱九江非統三湖言之水經云九江在下雋縣北蓋卽楚辭所謂北渚南史所謂三湘浦也

厥土惟塗泥厥田惟下中厥賦上下

傳曰田第八賦第三人功修林氏曰土雖與揚州同而地勢稍高故田加於揚州一等

厥貢羽毛齒革惟金三品

渭按毛漢書作旄

傳曰土所出與揚州同正義曰揚州先齒革此州先羽毛者蓋以善者爲先由此言之諸州貢物多種其

次第皆以當州貴者爲先也林氏曰揚先金三品而此先羽毛齒革揚先齒革而此先羽毛孔氏謂以善者爲先薛氏謂以多者爲先二說皆通按職方揚州其利金錫荊州其利丹銀齒革則荆揚之產不無優劣可見矣渭按楚語王孫圉曰楚之所寶齒角皮革羽毛所以備賦用以戒不虞者也韋注云角所以爲弓弩齒象齒所以爲弭皮虎豹皮也所以爲茵韃犀兕也所以爲甲冑羽毛也所以爲旌毛旄牛尾所以注竿首觀於此言則羽毛齒革信惟荆產最良而其爲用亦大略可觀也

左傳晉重耳對楚子曰羽毛齒革君地生焉其

於揚信矣然周禮言荊州之利有齒革而無羽毛
左傳鄭聲子曰如杞梓皮革自楚往也荀子曰楚
人鮫革犀兕以爲甲韜如金石則楚之齒革亦美
不知何以獨後於羽毛意者孔翠旄牛之屬皆出
徼外物貴而致之亦難而揚之羽毛則唯取諸境
內之鳥獸此其所以有先後之殊也與

揚州傳以毛爲旄牛之尾今按地理志言蜀西近
邛笮馬旄牛師古曰邛笮之地出馬及旄牛故蜀
郡有旄牛縣後漢書云冉駹夷出旄牛是也今甘
肅臨洮亦有之皆去揚絕遠唯荊則來自梁域較
易耳然雍梁又不以爲貢殊不可解

爾雅曰南方之美者有梁山之犀象焉地理志言南粵近海多犀象陶弘景注名醫別錄云犀出武陵交州寧州諸遠山蘇頌圖經本草曰今象多出交趾潮循諸州世傳荆蠻山中亦有野象然楚粵之象皆青黑惟西方拂林大食諸國乃多白象樊綽雲南記備言其事滑按象犀嶺南皆有之荆揚致此並易齒革二物當無優劣也

犀革爲甲

吳語奉文犀之渠章注謂辦也吳都賦云戶有犀渠是犀革亦可以飾

牛尾爲旌旄此

用之必不可已者也詩小雅曰象弭魚服禮記玉藻曰孔子佩象環五寸楚辭離騷曰雜瑤象以爲車則象齒中器服之飾後世又有用爲牀者戰國

策孟嘗君至楚獻象牀注云象齒爲牀是也至其

所謂羽者傳但云鳥羽津昭國語注同而疏以孔雀翡翠當

之南方異物志云孔雀出交趾雷羅諸州南人生斷其尾以爲方物按左傳楚子翠被豹舄

鄭子臧好聚鷓冠鷓即翠鳥九歌曰孔蓋兮翠旒與旒同注云

言以孔雀之翅爲車蓋翡翠之羽爲旗旒也招魂

曰砥室翠翹挂曲瓊些翡翠珠被爛齊光些又曰

翡翠帷翠帳飾高堂些李斯諫逐客書曰建翠鳳之

旗此皆衰世之事不見於經古風淳樸不知有此

等否竊謂雉羽文明可用爲儀說文雉伊洛以南

曰翬江淮而南曰搖雉鷄同徐鉉曰古名雉爲翟鄭康

成周禮注云伊雉而南素質五色皆備成章曰翬

江淮而南青質五色皆備成章曰搖故王后五路

有重翟厭翟六服有揄狄闕狄

通作翟

蓋羽畎夏翟不

足以供其用而南方之翬搖亦必取給焉又有鶩

雉爾雅所謂鶩山雞者周書謂之采雞一名鷓鴣

出南粵諸山中湖南湖北亦有之周有鶩冕漢有

鷓鴣冠皆以其羽爲飾王會解蠻揚之翟注云揚

州之蠻貢翟鳥經所言恐只是此類聖人不貴難

得之貨未必用孔翠之屬也

管子曰金起於汝漢韓子曰荆南之地麗水之

生金此黃金也周禮荊州曰其利丹銀此白金也

左傳鄭伯朝於楚楚子賜之金旣而悔之曰無以

鑄兵遂以鑄三鐘此赤金也三品荆皆有之楚語
王孫圉言金生雲連徒洲之數而周禮獨言銀則
銀必多且美按後魏書銀出始興陽山縣又出桂
陽陽安縣元和志銀坑在郴州平陽縣南三十里
所出銀至精俗謂之徧子銀別處莫及通典衡巫
二州貢麩金邵州貢銀皆荆域也而嶺南桂賀昭
潯高廉端柳等二十四州出銀作貢並在荆之徼
外壤地密邇得之甚易此職方所以獨稱銀與
王氏日記云古者以珠玉爲上幣黃金爲中幣刀
布爲下幣三幣握之則非有補於暖也食之則非
有補於飽也先王以守財物以御人事而平天下

則有時而用焉其取之有時其用之有節其貢也
致之邦國而天子無私求與私藏也周之衰荆揚
之貢金不入而周王求之於魯春秋譏之漢元帝
時貢禹請罷採珠玉金銀鑄錢之官毋復以爲幣
租稅祿賜皆以布帛及穀使百姓一意農桑貢禹
之言固先王之意也然泉貨所以交通百物布帛
不可以尺寸分裂禹因後世之弊而遂欲廢先王
之制幣則過矣渭按此論甚正莊子稱聖人捐金
於山藏珠於淵不過寓言以諷世主之奢靡而實
非事情使其果然則禹貢非聖人之書矣捐金藏
珠謂不自採取則可并邦國之貢亦却之而唯以

布帛菽粟相授受堯舜中正之道不如是也

柁榦栝柏

釋文柁刺倫及徐勣音反又作櫓
榦本又作幹故且反栝古括反

傳曰榦栝也柏葉松身曰栝正義曰榦爲弓榦考工
記云弓人取榦之道七以栝爲上知此榦是栝也釋
木云栝柏葉松身陸璣毛詩義疏云柁櫓栝漆相似
如一則柁似櫓漆也柁栝柏皆木名也以其所施多
矣栝木惟用爲弓榦弓榦莫若栝木故舉其用也顏
氏曰柁木似櫓而實曾氏曰揚州貢木不言名者不
可勝名也此言柁榦栝柏其所貢止此耳金氏曰榦
材中弓弩之榦周官所謂荆之榦是也渭按考工記
弓榦栝爲上櫓次之檠桑次之橘次之木瓜次之荆

次之竹爲下林氏謂不必專指柘凡木可以爲弓幹者皆是似勝舊說蓋幹材頗多不可徧舉故括之曰
幹

說文云柎木也夏書曰柎榦括柏或从熏作榦又

云柎柎也左傳孟莊子斬其柎以爲公琴杜注云

柎木名柎也琴材徐鍇曰柎木似榦與榦同中車轅實

不堪食柎又作椿蘇恭曰椿榦二樹形相似但榦

疎椿實爲別也蘇頌曰椿朱實而葉香榦木疎而

氣臭榦最無用莊子所謂其木擁腫不中繩墨小

枝曲拳不中規矩者李時珍曰椿榦皆一木而三

種榦考皆不材之木不似椿堅實可入棟梁也渭

按柀樗櫛椿爲一木字異而音義並同柀與樗櫛
雖相似而樗櫛不材貢之何爲則柀與樗櫛實異
種也柀一作樗蓋椿葉香故從熏柀之爲椿明矣
其材大抵中琴中車轅蘇傳曰柀柀也以為弓榦
是以柀榦爲一木考諸書無言柀即柀中弓榦者
恐非

爾雅樅松葉柏身檜柏葉松身說文同而栝作栝
解云櫛也一曰矢栝築弦處檜亦音古活切集韻

云檜古作栝通作栝書柀榦栝柏爾雅翼云檜性

耐寒其材大可爲棺槨及舟

詩曰檜楫松舟
傳曰棺有輪檜

今人謂

之圓柏韻會引字說云檜柏葉松身則葉與身皆

曲樅松葉柏身則葉與身皆直樅以直從檜以曲
會李時珍本草曰檜葉尖硬亦謂之栝今人名圓
栝以別於側柏茅氏匯疏云澠水燕談載亳州法
相禪院矮檜一郡珍玩目其寺曰矮栝似栝檜一
也渭按傳訓栝與爾雅檜同說文解檜如爾雅而
栝下不復出則栝檜實一木北音讀栝為古外切
故又有木旁从檜之字栝乃柏之類葉扁而側生
者為柏俗謂之側柏葉尖硬而向上者為栝俗謂
之圓栝

王氏日記云古荆揚之木貢有則貢之棟字器用
有所須則用之甚儉而易供也後代有營繕則工

師求大木至於深山窮谷人跡不到之處懸崖弔
橋艱難萬倍比至深澗必待夏秋洪水泛漲方抵
大江嗚呼林麓盡矣帝省其山則何辭以對是故
禹卑宮室而作訓以峻宇彫牆爲戒豈非人君之
所當守哉

韓非子稱堯舜茅茨不翦采椽不斲土階三尺其
言或太甚當時未必若是之樸陋然禹卑宮室固
堯舜家法後世陵雲槩日之構我知其無有也荆
揚貢木或以爲其中有宮室之用余按魯頌曰徂
來之松新甫之柏商頌曰陟彼景山松柏丸丸皆
言作寢廟事可見古人之宮室唯以松柏爲之不

須奇木而周禮冀州之利曰松柏則帝都附近之地俱之而有餘何必遠取諸他州竊意岱畎之松嶧陽之桐及荆之杙榦栝柏皆器用之材而揚之貢木雖多亦未必有梗楠豫章合抱之木長至十餘丈者也。大禹作貢必不貽害於民近世採皇木者輒求之楚蜀深山之中林麓盡而民力與之俱盡此義明庶乎其知做矣。

礪砥砮丹

釋文礪力世反砥音脂徐之履反韋昭音貢砮音奴韋昭乃固反謂按礪漢書作厲

傳曰砥細於礪皆磨石也。砮石中矢鏃丹朱類正義曰砥以細密為名礪礪麤為稱鄭云礪磨刀刃石也。精者曰砥魯語曰肅慎氏貢楛矢石砮賈逵云砮

矢鏃之石也丹者丹砂王肅云可以爲采夏氏曰
海經謂荆山首自景山至琴鼓山凡二十有三而
多砥礪則荊州貢砥礪亦宜矣金氏曰礪砥今郢
是也祭則今思播有之丹朱砂也今辰錦所出光
砂及溪洞老鴉井所出尤佳澤按此四者皆石之
子虛賦言雲夢之石曰賦劫玄厲張揖云玄厲黑
石可用磨也是礪砥出雲夢穀梁傳曰天子之楠
斲之礪之加密石焉范注云以細石磨之細石即
砥也

魯語仲尼在陳有隼集於陳侯之庭而旼楛矢貫
之石砮其長尺有咫以問仲尼仲尼曰隼之來

也遠矣此肅慎氏之矢也昔武王克商通道於九
夷八蠻於是肅慎氏貢楛矢石砮其長尺有咫銘
其楛曰肅慎氏之貢矢

楛箭羽之間

以分大姬配虞胡公

而封諸陳君若使有司求諸故府其可得也使求
得之金櫝如之蘇子瞻石砮記曰余自儋耳北歸
江上得古箭鏃槊鋒而劔脊其廉可劇而其質則
石此即所謂楛矢石砮孔子不近取之荆梁而遠
取之肅慎則荆梁之不貢此久矣王明逸云女直
即古肅慎之地今尚產楛矢石砮石砮出黑龍江
口名水花石堅利入鐵子瞻之所見古荆梁外徼
固宜有之也渭按孔子知爲肅慎之矢者亦以其

長尺有咫耳非以荆梁不貢而徵諸肅慎也荆梁
即不貢中國豈絕無此物而射隼者必肅慎乎子
瞻說未當然因此可見古荆梁石弩之狀亦佳話
也

周禮揚州曰其利丹銀說文丹巴趙之赤石也外
象采丹井中丹形徐鍇曰得丹穴而富穴即井也
蘇頌圖經本草曰丹砂今出辰州宜州階州辰最
勝謂之辰砂其魄大者如雞子小者如石榴顆芙
蓉頭箭鏃連狀者碎之蘄巖作牆壁真辰砂也渭
按周書王會卜人以丹砂孔晁注曰卜人西南之
蠻丹砂所出王應麟補注曰太平御覽卜人蓋今

之濮人也伊尹爲四方獻令正南百濮牧誓注濮
在江漢之南左氏傳巴濮吾南土也然則卜人寔
荆域故貢丹砂也通典辰州貢光明砂四斤是辰
產最勝丹砂與金銀爲一氣封禪書李少君曰丹
砂可化爲黃金後世方士又用諸藥合丹砂鍊制
爲銀孝經援神契云石潤苞玉丹精生金鶴頂新
書云丹砂始生針石二百年成丹砂三百年而成
鉛又二百年而成銀又二百年復化而爲金李時
珍曰今毋砂銀生五溪丹砂穴中色理紅光丹砂
與金銀爲一氣信矣

注箇籀楷

釋文箇求隕反
籀音路楷音戶

傳曰籥箛美竹楛中矢榦三物皆出雲夢之澤正義
曰鄭云籥箛聆風也竹有二名或大小異也肅慎氏
貢楛矢知楛中矢榦顏氏曰籥箛竹名楛木名也皆
可爲矢曾氏曰董安于之治晉陽也公府之垣皆以
荻蒿苦楚腐之其高丈餘趙襄子發而試之其堅則
籥箛之所不能過也則籥箛竹之堅勁者其材亦中
矢之筈

箛一作箛說文籥箛也一曰博棊又云箛籥箛竹
名引夏書惟籥箛楛籥或作箛招魂曰箛蔽象棊
有六箛洪興祖補注云箛竹名故說文以籥爲箛
棊呂氏春秋曰駱越之籥則南越亦產此竹箛

或以爲二種或以爲一種未知孰是鄭謂大小異名理或然也詩大雅曰瞻彼旱麓榛柎濟濟陸璣草木疏云楛形似荆而赤莖似著上黨人織以爲牛筥箱器又屈以爲婦人釵然則楛亦北地所有但不中矢榦故必取諸荆耳

正義云三物皆出雲夢之澤當時驗之猶然渭按楚語王孫圉云有藪曰雲連徒洲金木竹箭之所生也韋昭謂即雲夢之藪故孔傳據以爲言非必當時驗之傳出魏晉間人手此又一證矣金者金三品也木者枕榦栝柏楛也竹箭者籥箛也周禮曰藪以富得民雲夢之藪富矣哉

古矢筈之材有竹有木竹二一爲揚之篠一爲荆之筈籥也木二一爲荆之楛一爲翼之蒲也左傳宣十二年晉厨子曰董澤之蒲注云蒲楊柳可以爲箭河東聞喜縣東北有董池陂是蒲柳亦中矢筈禹時在甸服故無貢

三邦底貢厥名

呂氏曰凡棟榦及楛十物非朝廷所常用必使之貢則勞民不使之貢則有用而或闕故惟使貢其名名者列其條目而貢之也聖人處事之精審如此渭按底貢厥名與錫貢意相似但揚豫所言止一物而此則爲物甚多故列其所須之名而使致貢於京師經

所以異其文曰底貢厥名也

林少穎云三邦之地經無明文難以考據按考工記材之美者有玢胡之筍鄭注云胡子之國在楚旁意者即三邦之故地歟渭按胡歸姓之國也漢志汝南汝陰縣故胡國杜預左傳注同今鳳陽府穎州西北有胡城廢縣是也胡國後爲楚所并其初亦不可謂在楚旁禹貢爲豫州之域去雲夢絕遠三邦當闕疑林說殊屬附會

傳云箇籟楛三物皆出雲夢之澤近澤三國皆致貢之其名天下稱善張氏曰三物貢其尤美者厥名猶言尤美也以此句專承三物恐非蘇氏曰三

邦大國次國小國也椀榦栝柏礪砥砮丹與篋簞
楛皆物之重者荊州去冀最遠而江無達河之道
難以必致重物故使此州之國不以大小但致貢
其名數而準其物易以輕賫致之京師重勞人也
林少穎云此說不然夫所謂任土作貢者皆其服
食器用之物而不可闕故使準其本歲所輸之賦
而貢於京師若謂當貢之物準其名數易以輕賫
正非作貢之本意也渭按林說良是且揚州貢木
更多梁州貢鐵砮等皆重物也而路尤遠於荆何
以獨不易輕賫乎呂說勝孔亦勝蘇灼然可從

包甌菁茅

釋文甌音軌菁字
下反徐音精馬同

傳曰甌匣也茅以縮酒正義曰匣是匱之小者菁茅所盛不須大匱故用匣僖四年左傳齊桓公責楚云爾貢包茅不入王祭不共無以縮酒郊特牲云縮酒用茅明酌也特令此州貢茅茅當異於他處杜預秀茅之爲異未審鄭玄以爲菁茅茅之有毛刺者王氏曰包匱菁茅者包且匱也物或筐或包至菁茅則包且匱者正以供祭祀故嚴之也朱子曰古人榨酒不以絲帛而以編茅王室祭祀之酒則以菁茅取其至潔也吳氏曰揚州洗筐後包此先包後筐者以菁茅祀貢重物包而且匱故升在筐前渭按水經注云晉書地道志曰泉陵縣有香茅氣甚芳香言貢之以縮

酒

見湘水泉陵為零陵郡治

蓋此茅潔且芳異於他處所產宜縮祭祀

之酒故特令包匭而貢之

孔傳截包字為句而謂即橘柚王肅云揚州厥包橘柚從省而可知也此不須多辯只以左傳包茅二字折之足矣傳又以菁茅為二物曰菁以為菴茅以縮酒正義曰周禮醢人有菁菴鹿麇故知菁以為菴鄭云菁菴菁也菴菁處處有之而令此州貢者蓋以其味善也注按呂氏春秋云具區之菁則菁以揚產為美未聞荊州味善也且菁為七菴之一何獨與縮酒之茅同其貴重鄭注此經以菁茅為一物符合左傳確不可易

鄭云匭猶纏結也重之故既包裹而又纏結也張
子韶云安國謂匭為匣而礙於包故以包為橘柚
康成以包為裹而礙於匭故謂匭為纏結余謂此
物專供祭祀故以匭藏之又以複帕包匭而致嚴
也學欲通古今不因見今日複帕包盤杆之屬則
包匭之說終為孔鄭所惑矣渭按菁茅菁然華
盛而氣更芬芳貢之者欲其色香不變故包而加
之以匭包在內匭在外也恐與複帕包盤杆不同
周禮甸師祭祀供蕭茅鄭興云蕭字或為茵茵讀
為縮束茅立祭前酒沃其上酒滲下若神飲之故
謂之縮杜注左傳用其說魏華父云古無灌茅之

義所謂縮酒只是醴有糟故縮於茅以清之若曰
滲下去如神飲此臆說也渭按周禮司尊彝曰醴
齊縮酌注云以茅縮去滓也解縮字甚明仍不用
先鄭祭前沃酒之說

茅氏匯疏曰蠻溪叢笑云麻陽包茅山茅生三脊
孟康曰零茅揚雄曰瑤茅皆三脊也爾雅謂之藹
廣雅謂之茈蒨本草云生楚地三月採陰乾猺人
以社前者爲佳名鴉銜草今辰常並出包茅山在
麻陽縣東九十里靖州亦多有之渭按封禪書管
仲謂桓公曰江淮之間一茅三脊所以爲藉也其
用不同恐別是一種易曰藉用白茅者是且江淮

之間謂淮南江北也其在古荊州域者今爲德安
黃州二府地而未聞有異茅焉晉地道志亦不言
香茅有三脊荊州所貢殆非管仲之所稱也湖南
產茅處雖多終當以泉陵之香茅爲正泉陵今永
州府治零陵縣及所領祁陽縣皆其地也

吳幼清云菁茅所以供祭祀縮酒之用三邦底貢
其有名者舊以三邦底貢厥名屬上文籩簠楛非
是渭按孔疏云鄭玄以厥名下屬包匭菁茅吳說
本此審爾則經何不曰包匭菁茅三邦底貢厥名
乎其非可知

籩
玄
鱣
璣

組

釋文總許云反璣其依反又音機
馬同玉籩茶依居沂二反組音祖

傳曰此州染玄纁色善故貢之璣珠類生於水組綬類正義曰釋器云三染謂之纁李巡云三染其色已成爲絳纁絳一名也考工記云三入爲纁五入爲緌七入爲緇鄭云纁者三入而成又再染以黑則爲緌又再染以黑則爲緇玄色在緌緇之間其六入者是染玄纁之法也說文云璣珠不圓者故爲珠類玉藻說佩玉所懸者皆云組綬是組綬相類之物也張氏曰組此州所善織絳者吳氏曰玄染黑六入者七入則爲緇深黑矣纁染絳三入者四入則爲朱深赤矣璣組以璣穿結爲組也渭按玄纁之質蓋織也其不言織者蒙徐玄織之文從可知也此州產璣善爲組

故貫珠於組以獻珠不入筐貫於組故筐之機組是一物當從吳說

沈氏筆談云古人謂幣為玄纁五兩者一玄一纁為一兩玄赤黑象天之色纁黃赤象地之色故天子六服皆玄衣纁裳以朱漬丹秫染之爾雅曰一染謂之緜緜今之茜也色小赤再染謂之窺窺頰也三染謂之纁蓋黃赤色也玄纁二物今之用幣以皂帛為玄纁非也滑按考工記鍾氏染羽以朱湛丹秫湛子三月而熾之淳而漬之三入為纁五入為緜七入為緇鄭謂六入為玄合諸爾雅唯四入不知為何色吳幼清云四入為朱理或然也

璣珠之不圓者字書又云小珠也呂氏春秋曰人不愛崑山之玉江漢之珠而愛已之蒼璧小璣李斯諫逐客書曰宛珠之簪傅璣之珥是亦為婦人首飾璣小而不圓故薛士龍云今荊州多蚌珠不足貴也

禮記玉藻曰天子佩白玉而玄組綬公侯佩山玄玉而朱組綬大夫佩水蒼玉而純組綬世子佩瑜玉而綦組綬士佩璫玨而緼組綬此佩玉之組也玄冠丹組纓諸侯之齊冠玄冠綦組纓士之齊冠此冠纓之組也天子素帶終辟大夫素帶辟垂士練帶率下辟居士錦帶弟子縞帶并紐約用組三

寸長齊于帶此帶紐約之組也組之爲用有三唯
佩玉之組貫珠餘則否其制有珩璜瑀琚之名上
橫曰珩繫三組貫以蠙珠中組之半貫瑀末懸衝
牙兩旁組各懸瑀璜又兩組交貫於瑀上繫珩下
繫璜行則衝牙擊璜而有聲也此州所貢正佩玉
之組君臣佩玉尊卑有等故或用珠或用璣焉

九江納錫大龜

傳曰尺二寸曰大龜出於九江水中正義曰史記龜
策傳云龜千歲滿尺二寸漢書食貨志云元龜距髯
長尺二寸故以尺二寸爲大龜蘇氏曰寶龜不可常
得有則納之若以下錫上者然不在常貢之例薛氏

曰大龜國之所守其得不時不可以爲常又不可錫
命使貢唯使有之則納錫於上林氏曰大龜至靈之
物不可以求而得九江之地有倘而得之若豫且者
則使之納錫於上錫者與師錫帝曰禹錫玄圭之錫
同意重其事也陳氏櫟曰錫貢如敷錫之錫上錫下
也納錫如師錫之錫下錫上也吳氏曰謂納不謂貢
明其非貢物也故於貢包篚之外別出此條邵氏曰
前知神物大疑是稽重其事必異其禮書法云乎哉

孔傳云龜不常用錫命而納之林少穎云如此則
何以異於錫貢薛說爲當然東坡已先得之不待
薛也龜策傳曰神龜生於江水中廬江郡常歲時

生龜長尺二寸者二十枚輸太卜官是與常供無異食貨志曰元龜爲蔡非四民所得居有者入大卜受直則王莽制也莽有所興造必欲依古得經文此令殆規摹納錫之意

易曰或益之十朋之龜弗克違元吉楚語王孫圉曰龜足以憲臧不則寶之食貨志元龜炬冉長尺二寸直二千一百六十爲大貝十朋孟康曰冉龜甲緣也炬至也度背兩邊緣尺二寸也蘇林曰兩貝爲朋朋直錢二百一十六元龜十朋故二千一百六十也蓋商周之際以龜貝爲幣元龜一直大貝二十是謂十朋之龜虞夏以龜神物而不爲幣

非財貨比故重其事曰納錫也

祖伊曰格人元龜罔敢知吉元龜與格人並稱尊之至矣箕子世求洪範大禹之法也有大疑謀及卜筮龜從筮逆猶可以作而龜逆則必不可以作古人之信龜篤於信筮故史蘇有筮短龜長之說邵氏云重其事必異其禮此意先儒所未及按周禮鄉老及鄉大夫羣吏獻賢能之書于王王再拜受之登於天府小司寇孟冬祀司民獻民數于王則拜受之受大龜之錫當亦用此禮也

浮于江沱潛漢逾于洛至于南河

釋文逾
羊朱反

傳曰逾越也河在冀州南東流故越洛而至南河正

義曰浮此四水乃得至洛本或潛下有于誤耳王氏
曰凡曰逾皆水道不通遵陸而後能達也曾氏曰漢
與洛不相通故曰逾于洛自洛以至豫州之河故曰
至于南河程氏曰不徑浮江漢兼用沱潛者隨貢物
所出之便或由經流或循支派期便事而已渭按江
北之地可徑浮潛漢而江南則必由江沱以入潛漢
江沱潛或由或否漢則其所必由者也

漢水北距洛水六七百里欲自漢逾洛則必沂山
源而上其惟丹水乎漢志弘農郡丹水縣下云水

出上雒冢領山東至析入鈞

師古曰鈞亦水名按今南陽府
內鄉縣西南百二十里有丹水

故城南去丹水二百步縣西
有淅陽故城本漢析縣也

上雒縣下云禹貢雒水出冢領

山東北至鞏入河

今陝西西安府商州治即漢上洛縣也洛南縣亦上洛地鞏縣今屬河南府

水經

注丹水出京兆上洛縣西北冢領山

商州志秦嶺在州西八十里其地有澗曰

息邪澗丹水所出

東南流與清池水合

水出東北清池山

又東南逕其縣

南楚水注之

水出縣西南楚山昔四皓隱於此

丹水自倉野又東歷菓

和山

左傳哀四年楚人謀北方司馬起豐析以臨上洛左師軍於菓和右師軍於倉野杜預曰上洛縣東有菓和山今商州南百四十里有倉

野又東南逕商縣南歷少習出武關

應劭曰秦之南關也通南陽郡左傳哀四

年楚左司馬使謂晉陰地大夫曰將通於少習以聽命京相璠曰楚通上洛

阨道也漢祖下析郟攻武關文預曰武關在析縣西一百七十里按今商州東有商洛廢縣即漢商縣也商南山陽鎮安

三縣亦商縣地武關在州東一百八十里又東南流入曰口歷

其戍下又東南浙水注之

水出析縣西北盧氏縣大嵩山南流逕修陽故城北又東逕析縣故城北

春秋之白羽也又歷其縣東南流至丹水縣注于丹水

又東南逕三戶城又逕丹水縣

故城西南

縣有密陽鄉古商密之地楚申息之師所戍春秋之三戶也今內鄉縣西南有三戶城

又東南流

至其縣南

水南有丹崖山頽壁霞舉

又南逕南鄉縣故城東北

城在今南陽縣

西南百里本漢析縣地

又東歷於中之北所謂商於者也

張儀說楚絕齊許以商於

之地六百里即此裴駟曰有商城在於中故曰商於杜佑曰今內鄉西七里

有於村亦曰於中丹水又南合洧水

洧音市若切蓋洧

謂之浙口

均水注云均水出盧氏縣熊耳山東南流逕其縣下南逕南鄉縣又南與丹水合又

南逕順陽縣西有石山南臨洧水洧水又南流注于沔水謂之洧口按今南陽府浙川縣東北三十里有順陽故城本漢浙縣之順陽鄉也此注洧亦誤

為渭按沔水注云沔水自武當縣城東

城即今襄陽府均州治

又

東南逕涉都縣東北

本筑陽縣之涉都鄉

均水於此入沔謂之

均口在今穀城縣界均鈞同或从水作洧韻會均

字下云隋置均州取洧水名之是洧即均也史承

水經之誤曰洧口晉桓温伐秦水軍自襄陽入洧

口至南鄉是也或又曰洧均口齊陳顯達攻魏馬

圈軍入均口是也楚通少習漢入武關皆在丹水之旁而南朝北伐其舟師必由均口而進可見爲南北水陸之孔道商州西北諸山皆秦嶺也冢領亦秦嶺之別名丹水出其東南洛水出其東北中隔一嶺陸行當不甚遠禹貢逾洛之道計無便於此者以今輿地言之浮漢水至穀城縣東北入均口泝丹水而上經浙川南陽內鄉抵商州導源之處越冢領而北浮洛水經盧氏永寧宜陽洛陽偃師至鞏縣以達于南河此荊州之貢道也

自漢逾洛之道黃文叔云舍舟陸運出汝葉金吉甫云自漢入丹河白水河即躡山路入洛今按陸

行出汝葉則必更天息女几嵩少輾轉諸山中崎
嶇二三百里貢道必不由此丹河即丹水白水河
蓋謂涓水是兩道涓水出盧氏縣熊耳山沂此水
而上亦可逾于洛然洛水在縣南五里涓源北去
縣百五十里宋元嘉中伐魏龐季明柳元景皆從
山谷中度軍出盧氏不聞有水道涓洛之間陸運
百五十里殊費民力唯丹水爲自楚入秦之捷徑

水多陸少逾洛從此無疑

唐書崔湜建言山南可引丹水通漕
至商州自商饒山石門北抵藍田

河通輜道以湜充使開大昌關役徒數萬竟不通按此亦用丹水而欲鑿
山爲輜道直抵藍田即令其道得通而虜財害民與逾洛之事大不侔矣

或問底柱三門之險古今所同患荊豫及兗青徐

揚與冀之東北境貢入帝都必由南河經底柱將

若之何曰唐裴耀卿於三門東西置倉開山十八里爲陸運以避其險疑禹時亦用此法貢物輕約易齋與漕穀不同避險從陸而改舟以達平陽無難也然砥柱初析闕流之害除或不若後世之險絕亦未可知

禹貢錐指卷第七